

राजनाथ सिंह—बैठक

केंद्रीय गृहमंत्री राजनाथ सिंह ह आज नया रायपुर म गृह अउ पुलिस विभाग के बड़का अधिकारी मनके उच्च स्तरीय बइठका लीन। बइठका म मुख्यमंत्री डॉक्टर रमन सिंह घलो मौजूद रीहिन हे। ए बइठका म माओवादी परभावित अउ प्रधानमंत्री के प्राथमिकता वाले जिला मन म विकास काम अउ माओवादी ल खतम करे के परयास उपर गोठबात होइस। एखरे संग माओवादी मन ले निपटे बर ठोस रणनीति बनाय उपर घलो विचार विमर्श करे गीस।

खबर के मुताबिक काली दंतेवाड़ा जिला म माओवादी मन डहार ले करे गे बारूदी सुरंग विस्फोट म सात झिन जवान मन ह शहीद होगे रीहिस हे।

राजनाथ सिंह—अंबिकापुर

एखर पहिली, केंद्रीय गृहमंत्री राजनाथ सिंह ह आज अंबिकापुर म केंद्रीय रिजर्व पुलिस बल—सीआरपीएफ के नवा नक्सल रोधी बस्तरिया बटालियन के स्थापना करीन अउ एखर पासिंग आउट परेड म शामिल होइन। कार्यक्रम म मुख्यमंत्री डॉक्टर रमन सिंह घलो मौजूद रीहिन।

ए मउका म केंद्रीय गृहमंत्री ह कीहिन कि सीआरपीएफ के जवान मनके अब शहीद होय म कम लेकम एक करोड़ रुपिया के मदद राशि दे जाही। ओमन यहू कीहिन कि गंभीर रूप ले घायल होय अउ हाथ—पैर टूटे जवान मन ल घलो मदद राशि दे जाही। श्री सिंह ह बताइन हे कि शहीद जवान के परिवार वाले मनके मदद बर समस्या निवारण सेल बनाय गेहे। श्री सिंह ह कीहिन हे कि केंद्रीय सुरक्षा बल अउ पुलिस के बीच सुधर तालमेल के सेती माओवादी गतिविधि म कमी आय हे।

ओमन कीहिन कि माओवादी मन ह नइ चाहें कि बस्तर अउ राज्य के दूर दराज क्षेत्र के विकास होवय। केंद्रीय गृहमंत्री ह ए मउका म आने आने क्षेत्र मन म सुधर काम करइया जवान मन ल सम्मानित करीन।

माओवादी वारदात

बीजापुर जिला म तेलंगाना सीमा ले लगे इलाका म सुरक्षा बल अउ माओवादी मनके बीच आज होय मुठभेड़ म एक महिला माओवादी मारे गीस। बीजापुर के पुलिस अधीक्षक मोहित गर्ग ह एखर पुष्टि करत बताइन कि तेलंगाना के ग्रेहाउंड फोर्स अउ जिला पुलिस बल डहार ले सीमावर्ती इलाका म सामलात अभियान चलाये जावत हे। इही बीच उसूर थाना क्षेत्र म माओवादी मन ह सुरक्षा बल मन उपर अचानक घात लगाके हमला कर दीन। सुरक्षा बल मन के जवाबी कार्रवाई म एक महिला माओवादी मारे गीस। उन्हें मुठभेड़ म आठ ले दस माओवादी मन ल गोली लगे के खबर हे। सामचार लिखे जाय तक मुठभेड़ जारी रीहिस।

इही बीच बीजापुर पुलिस ह कुटुरु थाना क्षेत्र म ग्यारा झिन माओवादी मन ल गिरफ्तार करीन हे। एमा दू झिन माइलोगिन घलो शामिल हे। ए जम्मां झिन उपर बारूदी विस्फोट करे के संगेसंग बीजापुरके मुंशी अउ दरभा सरपंच के हत्या समेत आने आने हिसंक घटना मन म शामिल रेहे के आरोप हे।

राजनीतिक दल चुनाव तैयारियां

अवइया विधानसभा चुनाव की तैयारी ल लेके अब प्रदेश म राजनीतिक हलचल म तेजी आगे हे। ए कड़ी म प्रदेश भाजपा के बइठका राजधानी के पार्टी कार्यालय म होइस। एमा प्रदेश भाजपा अध्यक्ष धरमलाल कौशिक समेत पार्टी के बड़का पदाधिकारी अउ नेता शामिल होइन। बइठका म श्री कौशिक ह कार्यकर्ता मनले कीहिन कि केंद्र सरकार के चार बछर पूरा होय म प्रदेश भाजपा डहार ले जिला इकाई मनके मदद ले आने आने कार्यक्रम आयोजित करे जाही। एमा कार्यकर्ता सक्रिय रूप ले शामिल होही अउ ओमन ह केंद्र सरकार के उपलब्धि मन ल आम लोगन तक पहुंचाही।

ओति प्रदेश कांग्रेस ह घलो अवइया पच्चीस मई ले शुरू होवइया पार्टी के संकल्प यात्रा के तियारी चालू कर देहे। प्रदेश कांग्रेस अध्यक्ष भूपेश बघेल ह बताइन कि पच्चीस मई ले बस्तर जिला के केशलूर ले संकल्प यात्रा शुरू होही।

आम आदमी पार्टी

इही बीच आम आदमी पार्टी के प्रदेश इकाई ह छत्तीसगढ़ म अवइया विधानसभा चुनाव बर अपन इकतीस उम्मीदवार मनके घोषणा कर देहे।

आम आदमी पार्टी के प्रदेश संयोजक डॉक्टर संकेत ठाकुर रायपुर ग्रामीण ले चुनाव मैदान म उतरहीं। फेर योगेंद्र सेन रायपुर उत्तर अउ उत्तम जायसवाल रायपुर पश्चिम ले चुनाव लड़हीं।

खबर के मुताबिक पार्टी ह प्रदेश के जम्मों नब्बे विधानसभा सीट मन म चुनाव लड़े के घोषणा करे हे।

राजीव गांधी पुण्यतिथि

आज देशभर म पूर्व प्रधानमंत्री राजीव गांधी ल उंखर सत्ताईसवां पुण्यतिथि म श्रद्धांजलि अर्पित करत हे। पूर्व प्रधानमंत्री डॉक्टर मनमोहन सिंह, यूपीए अध्यक्ष सोनिया गांधी अउ कांग्रेस अध्यक्ष राहुल गांधी समेत कांग्रेस के आने आने नेता मन ह दिल्ली म राजीव गांधी के समाधि स्थल वीरभूमि म फूल चढ़ाके श्रद्धांजलि दीन।

मुख्यमंत्री डॉक्टर रमन सिंह ह घलो पूर्व प्रधानमंत्री राजीव गांधी के पुण्यतिथि म ओमन के सुरता करत श्रद्धांजलि दीन। ए मउका म ओमन ह कीहिन कि कोनो भी लोकतंत्र अउ सभ्य समाज म हिंसा अउ आतंक बर कोनो जगा नइ हे। ओमन यहू कीहिन कि राष्ट्रीय एकता के भावना ल मजबूत बनाके हमन जम्मों झिन आतंकवाद अउ माओवाद के मुकाबला कर सकत हन।

आतंकवाद विरोधी दिवस

पूर्व प्रधानमंत्री राजीव गांधी के आज पुण्यतिथि आय। ए दिन ल राज्य सरकार ह आतंकवाद विरोधी दिवस के रूप म मनावत हे। ए मउका म राजभवन सचिवालय म अधिकारी अउ करमचारी मन ह आतंकवाद अउ हिंसा के विरोध करे के संगेसंग विघटनकारी शक्ति ले निपटे के शपथ लीन।

उहें, मंत्रालय म अपर मुख्य सचिव सुनील कुजूर ह जम्मों अधिकारी अउ करमचारी मन ल आतंकवाद अउ हिंसा के विरोध करे के शपथ देवाइन।